

La nova mediateca e la nova mensa sco center

Inauguraziun dal nov edifiz da la scola chantunala grischuna

■ (cc) A Cuira è vegnida inaugurada sonda passada uffizialmain la nova mediateca e la nova mensa da la scola chantunala grischuna sco er ils locals per la protecziun dals bains culturals per l'uffizi da cultura. Il nov edifiz complementar al Münzweg a Cuira è il punct final da la renovaziun totala da la scola chantunala grischuna. L'edifiz nov garantescha in'orientaziun persistenta da questa instituziun chantunala da furmaziun, ademplant a medem temp il standard d'ina scola media. La construcziun da la mensa e da la mediateca cumplettescha las infrastrukturas da la scola chantunala Halde e da la chasa Cleric. Dapi l'onn 2006 vegnan quellas sanadas architectonicamain en pass parzial ed

adattadas areguard il manaschi. Plinavant è vegn creà il spazi che vegn duvrà urgentamain per la protecziun dals bains culturals.

Lieu d'inscunter – tut sut in tetg

La nova piazza è ideala: per la mediateca sco lieu central per sa procurar infurmaziuns e per la mensa sco lieu da dimora e d'alimentaziun. Grazia a sia vischinanza cun la stgala da colliaziun sa chatta l'edifiz nov en in lieu central da las vias vi e nà da la scola chantunala Halde, da la chasa Cleric e dal tract da biologia sco er dal stabiliment da sport Sand.

Per ina scolaziun progressiva è indispensabla ina plattafurma d'infurmaziun e da barat cun ina mediateca moderna.

La nova mediateca gida a preparar las scholaras ed ils scolars da la scola chantunala grischuna per il mintgadi en in'università. Ella permetta l'access a las novas medias digitalas e stgaffescha l'ambient ideal per il studi autodidactic da litteratura spezialisada, da la lavur cun funtanas sco er da la confruntaziun scientifica cun tematicas complexas. En quests locals passentan las scholaras ed ils scolars er regularmain il temp senza instrucziun e quests locals èn er ils lieus da scuntrada natirals per tut la cuminanza dal campus.

Nov edifiz modern

L'edifiz nov è vegn costruì tenor Minergie-P-ECO e collià – ensem cun il stabiliment da sport Sand – cun la rait da

chalur a distanza. El posseda in tetg platanua ch'è installà in implant da fotovoltaica. Quest implant producescha in retgav annual da current da bundant 77 000 uras da kilowatt; quai correspunda a l'energia da circa 19 chasadas. Precedi las lavurs da construcziun ha la demontascha da l'anteriura chasa da scola da Rudolf Steiner sco er las exchavaziuns d'in onn dal servetsch archeologic dal Grischun. Là han ins scuvrì l'istorgia da passa 400 onns da la chasa.

Grazia a l'engaschi ed a la buna collaboraziun tranter il patrun da construcziun, ils planisaders, ils interprendiders e la citad da Cuira han pudì vegnir realisadas cun success las finamiras dal project areguard la qualitat, areguard ils custs ed

areguard ils termin. Ils custs budgetads da 27 milliuns francs per il nov edifiz complementar cun mensa, mediateca e locals per la protecziun dals bains culturals han pudì vegnir observads. L'uffizi federal da protecziun da la populaziun UFPP sa participescha cun in import da 640 000 francs als custs da construcziun dals locals per la protecziun dals bains culturals.

Di da las portas avertas

Cun in «di da las portas avertas» vegn pussibilità a la populaziun da prender vista dal sector da furmaziun e d'alimentaziun da la scola chantunala e dals locals d'archiv da la biblioteca chantunala e da l'archiv dal stadi.



L'edifiz nov dat suttetg a la mediateca nova ed a la mensa nova.



Satisfatgs da la construcziun reussida. Da san. il rector Gion Lechmann, l'architect chantunal Markus Dünser, il president da la regenza Mario Cavigelli e cusseglier guvernativ Martin Jäger.